

Famia a yega for di Merca ayera cu jet priva

Buskeda di hoben Mericano Holloway ta continua na Aruba cu asistencia di FBI

A instala un team di recherche local bao di mando di Jan vd Straten



ORANJESTAD—Mientars cu buskeda di e dama Mericano Natalie Holloway ta continua, cuerpo policial a start un recherche team special bao di guia di comisario Jan vd Straten, pa asisti cu e buskeda di e hoben cu ta perdi for di diadomingo ultimo. E dama ta perdi for di diadomingo despues cu a wak e dreña den un auto na Carlos & Charlie's diadomingo anochi casi mei anochi.

RECONSTRUCCION DI E CASO

E ekipo special ta bai purba investiga kico por a pasa cu e persona aki. “Nos ta bai purba haci manera un reconstruction di kico tabata e ultimo momentonan cu a wak Holloway” Gerold Dompig a bisa Bon Dia Aruba ayera.

FBI NA ARUBA

Dompig a confirma presencia di FBI (Federal Bureau of Investigation) na Aruba cu tambe ta asisti den e caso aki. “Nan tin interes den e

caso aki tambe y nan ta bai coopera cu nos pa wak kico ta e desaroyo aki” Dompig a bisa. E hecho cu FBI ta involucra den e caso aki ta cu e hecho cu e famia ta un ‘high-profile family’ cu ta hende cu tin basta placa” Dompig a sigui bisa indicando cu ora cu tin hende cu hopi placa, nan tin hopi poder pa tuma contacto cu congreso, FBI y otro instancianan federal. Esaki a conduci cu tin mas interes cu normal.

BUSKEDA FEDERAL

Merca tin un regla cu pa e prome 24 hora, e autoridad local ta encarga cu buskeda di e persona, pero ora cu esaki bira 48 ora, e ta cambia pa autoridad federal manera FBI. Den e caso aki cu e persona aki ta perdi for di diadomingo, ayera a bira momento pa FBI tuma e buskeda aki over.

PUBLICACION DI FOTO
Mientrastanto a cuminsa cu e buskeda publico cu publicacion di e potret di e

hoben dama aki caba y mas informacion pa asina inicia un buskeda di dje. “E team ta bezig cu esei hunto cu e famia pa duna informacion na comunidad pa e buskeda por haya mas speed” Dompig a bisa. Mientrastanto for di ayera caba e famianan a yega Aruba den un jet priva pa asisti cu e buskeda di nan yiu muhe.

INVESTIGACION

Informacion cu Bon Dia Aruba ta dispone di dje tambe ta muestra cu e dama lo a dreña un auto cu 3 persona aden, di cual uno lo a keda gara tambe. Esaki sinembargo no por a haya confirmacion riba dje. Version ta cu e trio a indica cu nan lo a ‘drop’ e dama bek na hotel, aunke esaki nunca no a aparece. E dama tabata parti di un grupo di 130 mucha cu tabata na Aruba pa nan vacacion hospedando na un high-rise hotel riba palm beach.